

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae átoa. Te hoo, e piti farane i te matahiti hoê.

"E ara o te vare noa outou i te paari hape, e te haavare faufaa ore a te hoê atu taata, na roto i te parau tutuu a te taata nei, ma te au i te mau peu o teie nei ao, te ore râ e au i te haapiiraa a te Kirito." Kolosa 2: 8.

Nu. 1.

10 Atopa, 1911.

Mat. 5.

Te Ravea Tia Mau no te Bapetizoraa. (TUATIRAA.)

E HI'OPOA tatou i te parau toe i papaihia i roto i te vea Katorika i te avae Tiurai. Te na ô maira te vea:

"E aha maoti te ravea i haapao hia i teie mau papetitoraa i parau hia nei maori râ te pîpîraa e aori râ te niniiraa? Te niniiraa ra, o te ravea ia i tohu hia mai e te mau Peropheta. Na ô maira Ioela 2: 28: 'E i muri a'e i te reira e ninii atu ai i ta'u varua i nia i te taata'toa.' Oia'toa te pîpîraa, Ezek. 36: 25: 'E i reira vau e pîpî ai i te pape ateate i nia ia outou, e mâ a'era outou i to outou mau viivii átoa ra.' Taa noa'tu ra e, e mea tia te pîpîraa e te niniiraa."

Oia iho â ia, e hoa e, ia hope te taata i te faaroo ia Iesu, e te tatarahapa i ta ratou mau hara, e te bapetizohia i te ravea tia mau, oia hoi, utuhiraa, ia matara ta ratou mau hara, e te tuuhia te rima e te mau tavini o te Atua, ei reira e ninii mai ai te Atua i ta'na varua i nia i te taata'toa, e e rave ratou i te tapao, e taotootoahia, e tohu hoi i te parau, e ite i te orama, etc. Eaha, ia ninii atu ai te Atua i ta'na varua i nia iho i te taata'toa, ei niniiraa pape ana'e te reira,

mai ta te Katorika e rave nei ei baptizoraa? Aita roa ia, aita roa teie nei parau i maitihia e te Katorika e tano i nia i te pîpîraa e te niniiraa i te pape, ei baptizoraa. Ei faahapa râ. Te faaite atoa nei te Katorika i te parau a Ezekiel 36: 25, ei faatiaraa i to ratou ravea apî pîpîraa ei baptizoraa. Te na ô ra hoi te taioraa:

“E i reira vau e pîpî ai i te pape ateate i nia ia outou, e mâ a'era outou i to outou mau viivii atoa ra, e mâ outou ia'u i to outou mau idolo atoa ra.”

E ere teie te oroa baptizoraa ei matararaa hara, o te tahi vahi ia no te oroa pûpûraa tusia no te ture a Mose i faahopehia i roto ia Iesu Mesia, te tusia mau faahopea ra. Tera mai te ture:

“Ua parau maira Iehova ia Mose, na ô maira, 6 E rave i te mau ati Levi i roto i te tamarii a Iseraela nei, e tamâ ia ratou. 7 E na ô oe ia ratou ei tamâraa ia ratou: e pîpî i te pape tamâ i nia iho ia ratou, e vau hoi ratou i to ratou tino e ati noa'e; e uhi hoi i to ratou ahu, e mâ ia ratou i reira. 8 A rave ai ratou i te hoê puaatoro apî e te tusia amu hoi no te reira, i te faraoa hua i anoihia i te hinu olive ra, e te hoê hoi puaatoro apî ei tusia no te hara.” Numera 8: 5-8.

Mai te mea te hinaaro nei te Katorika ia faarue te taata atoa i te ravea tia mau no te baptizoraa, oia hoi te utuhiraa i haapiihia i roto i te evanelia e i haapaohia hoi e Iesu, a haapao ai i te pîpîraa i te pape, mai tei haapiihia i roto i te ture a Mose, e mea maitai ia faaoti roa i taua oroa ra e pûpû atoa'tu ai i te puaatoro apî ei tusia, e anoi hoi i te faraoa hua i te hinu olive, e vau hoi ratou i to ratou tino, etc., eiaha ia rave pae-tahi noa i te ture. Papu roa'tu ra e, e mea tia ore te niniiraa e te pîpîraa ei baptizoraa. Te na ô maira te vea Katorika e:

“E mea ê te Papetitoraa o Ioane, e mea ê to te Katorika.”

E parau mau roa to te Katorika, “E mea ê te papetizoraa o Ioane, e mea ê to te Katorika.” Ua tonohia mai Ioane mai ô mai i te Atua ra. Ioa. 1: 6. No reira te baptizoraa pape a Ioane mai te ra'i mai ia. Ioa. 1: 33. Ua na ô maira te vea Katorika, e mea ê to ratou. No hea mai to ratou baptizoraa, no te ra'i mai anei, e na te taata anei?

YHWHU IESU CHRISTUS

1888

Teie te parau, na te taata, e mea faatupuhia ia e ratou i te toru o te tenetere i muri a'e i te Mesia. Ta te Atua râ ta Ioane ia. Te na ô maira o Paulo i muri a'e i te revaraa'tu o te Mesia: "Hoê Fatu, hoê faaroo, hoê baptizoraa." Te na ô maira tei papaihia ra e: "Ua faahope maira to te fenua o Iudea e to Ierusalema ia'na ra e baptizohia ihora e a'na i te pape ra i Ioridana, ma te fa'i i ta ratou hara." E o Iesu atoa hoi i te ravea hoê roa tia mau, oia hoi i te utuhiraa. Mareko 1: 5; Mataio 3: 16.

Ua faatia mai anei Iesu i te baptizoraa a Ioane, ma te faahapa'tu i te mau taata o tei ore i baptizohia e a'na? E, uana reira mau oia. Teie ta'na parau: "Area te mau Pharesia e te mau haapii ture, ua patoi ia ratou i te a'o a te Atua ia ratou iho, o ratou aore i baptizohia e a'na." Luka 7: 30. E au maori teie parau a Iesu i to te Katorika, no te mea te patoi nei ratou i te baptizoraa a Ioane. Na ô maira ratou:

"Aita te Katorika e tiaturi i ta Ioane papetitoraa."

E i faahapa râ. No reira te patoi puai nei te Katorika i te a'o a te Atua ia ratou iho i to ratou faahaparaa'tu i te baptizo a Ioane. Na ô faahou nei te vea Katorika:

"E taata noa iho oia (o Ioane), e a pohe atu ai oia, ua ore to'na Papetitoraa."

Oia iho â ia. Teie tei parauhia e Ioane. Mat. 3: 11:

"O vau nei, te baptizo nei ia ia outou i te pape ia tatarahapa outou, oia râ o te haere mai i muri iho ia'u nei, e mana rahi to'na i to'u, e baptizo ia oia (te Mesia) ia outou i te Varua Maitai e te auahi."

Oia hoi, ia apitihia to ratou baptizoraa pape i ravehia e Ioane i te baptizoraa Varua Maitai e te auahi. E ua ta-mau maite â te mau tavini a te Atua e te mau aposetolo i muri a'e i te poheraa o Ioane e te revaraa'tu o Iesu i te ra'i i taua haapaoraa tia mau. A hi'o tatou i tei papaihia i roto i te ohipa a te mau Aposetolo, 8: 12-17: "Ia faaroo râ ratou ia Philipa i te parauraa i te parau maitai o te basileia o te Atua, * * baptizohia ihora hoi ratou te tane e te

HISTORIAN'S OFFICE LIBRARY

The Church of Jesus Christ of Latter-day Saints

13240

vahine atoa.” Aita roa râ te tamarii. E ite a’era te mau aposetolo i Ierusalema ua mau to Samaria i te parau a te Atua, ua tonono atura ratou na aposetolo o Petero raua o Ioane i reira. E tae atura raua i raro, ua pure, ia horoahia mai te Varua Maitai ia ratou ra. Aore â hoi oia i tau mai i nia iho ia ratou ra, o te baptizo ana’e ra to ratou i te i’oa o te Fatu ra o Iesu. Ua tuu atura i to raua rima i nia iho ia ratou, noaa ihora te Varua Maitai ia ratou ra. Eaha, ua huru ê anei na baptizoraa, oia hoi te baptizoraa pape, e te baptizoraa Varua Maitai i muri a’e i te poheraa o Ioane e te reva-ê-raa o Iesu? Aita roa’tu, hoê â ia, mai te faaitchia mai i nia nei. Na ô maira te Katorika:

“Ahiri hoi hoê â to Iesu Papetitoraa, e to Ioane, e aha na pîpî a Ioane tei oti i te papetitohia e a’na, i papetito faahouhia’i i te Papetitoraa o Iesu Kirito e Pauro i Ephesia. Ohipa 19: 2-5. E tapao maoti e, e mea ê ta Ioane, e e mea ê ta Iesu.”

Teie te parau ta Paulo i ui atu ia ratou ra, oia hoi: “Ua noaa anei ia outou te Varua Maitai i to outou vai faarooraa nei? Ua parau maira ratou ia’na, Aita matou i ite e, i horoahia mai te Varua Maitai. Ua ui atura oia ia ratou, I baptizohia hoi outou i te aha? Ua na ô maira ratou, I te baptizoraa a Ioane ra. Ua parau atura Paulo, I baptizo â hoi Ioane i te baptizoraa tatarahapa, ma te parau atu i te taata e, e faaroo ratou ia’na i te haere mai na muri mai ia’na ra, oia hoi Iesu Mesia ra. E ia faaroo ratou i te reira, baptizohia ihora ratou i roto i te i’oa o te Fatu ra o Iesu. E i muri iho ua tuu ihora Paulo i ta’na rima i nia iho ia ratou ra, e ua haere maira te Varua Maitai i nia iho ia ratou.”

Papu roa ia, aita taua mau pîpî ra i baptizohia e Ioane. No te mea e, i uihia ratou e Paulo, ua noaa anei ia outou i te Varua Maitai? Ua parau maira ratou, aita ratou i ite e, i horoahia mai te Varua Maitai. Ua na ô atura oia ia ratou e, i baptizohia outou i te aha? Ua na ô maira ratou, i te baptizoraa a Ioane, aita râ ratou i na ô maira e, ua bape-

tizohia ratou e Ioane. Aita ratou i ite, e ei baptizoraa auahi tei haapaohia na muri i te baptizoraa pape, mai ta Ioane i haapii i te mau taata ta'na i baptizo ra. A hi'o Mat. 3: 11; Ioane 1: 33; Mar. 1: 8; Luka 3: 16. E ia ite Paulo i ta ratou ra parau, taa noa'tu ra oia e, e mea faufaa ore ta ratou baptizoraa, mai te mea ra hoi e, ua haavarehia ratou e te hoê taata faahua orometua, mana ore to'na. Te vai ra te reira huru o tei haapeapea i te Ekalesia. Gal. 1: 7; Ohipa 15: 24; Kor. Piti 11: 13. E i reira ua baptizofaahou-hia ratou e a'na. E i muri iho ua tuu to'na rima i nia iho ia ratou e ua noaa ia ratou te Varua Maitai. E e tapao hape ore te reira ua tia roa to ratou baptizoraa faahou e Paulo, ahiri aita râ, aore roa ratou e noaa i te Varua Maitai. Papu roa'tura e, na mua te baptizoraa pape, e na muri te baptizoraa Varua Maitai e te auahi, mai tei haapiihia e Ioane, e tei ravehia e Philipa raua o Petero e o Ioane. Ohipa 8: 12-17. Na ô maira te vea Katorika:

"Ua patoi etaeta te Momoni i te Papetitoraa i te tamarii."

E, e teie te tumu mau i na reira'i matou, maori râ, ia riro mau te faaroo e te tatarahapa ei matamua no te baptizoraa. Aita roa e tia i te tamarii rii ia faaroo e ia tatarahapa, no reira eiaha ratou ia baptizohia. Aita to te hara a Adamu e mana i nia i te tamarii rii. Ua faaore-roa-hia te hara tumu e te taraehara a te Mesia. Kor. Hoê 15: 22; Roma 5: 18, 19. E ore te hara e haapaohia i te ture ore. Roma 5: 13. No reira ua ora te tamarii rii no te mea aita roa ratou i ite i te ture. Aita roa te parau i faahitihia i roto i te Bibilia e, ia baptizohia te tamarii rii. Aita Iesu i baptizo i te tamarii rii, e aore atoa te mau aposetolo i baptizo ia ratou. Teie râ, ua rave maira te Fatu ia ratou e ua tuu atura i ta'na rima i nia iho ma te haamaitai atu ia ratou, aita roa râ oia i baptizo ia ratou.

Teie nei oroatia ore te baptizoraa tamarii e peu faatupunoa-hia ia e te taata, mai faaue-ore-hia mai e te Mesia, i te pae ropu i te toru o te tenetere i muri a'e i te Mesia. Opaniraa

parau. Ua faaite papu mai teie nei mau parau i papaihia i nia o te utuhi te huru baptizo i haapaohia e Iesu Mesia e ta'na mau pîpî. E o te ravea hoê tia mau ia. Ua haapao ore te Katorika i te reira, mai te haapîi atu i te taata e farii mai i te ravea niniiraa e aore râ te pîpîraa ei mono i ta Iesu i haapao. Teie te parau i porohia na te taata e hope roa'e, e Iesu Mesia, e ta'na mau pîpî, e ta'na mau tavini i te ano-tau hopea nei, e ua au ia fariihia e te taata atoa: E faaroo i te Atua e i ta'na tamaiti ia Iesu Mesia; e e tatarahapa i te mau hara atoa; Isa. 55: 6, 7; Mat. 3: 1, 2; e baptizohia i raro i te pape ia matara te hara; Ohi. 22: 16; ia au i to Iesu baptizoraahia; Mat. 3: 13-17; e ia au hoi ei tanuraa. Roma 6: 4, 5; Kol. 2: 12.

E tau hoa Katorika e, teie te parau e au maoti ia oe na, a farii mai oe i ta te Bibilia i faaite mai, eiaha e haapîi tei tuuhia mai e te taata ana'e ei mono i te parau a te Atua. Ia ora na.—VILIAMU SETEMILA.



E HOHO'A TEIE NO TE PUPU OROMETUA MOROMONA, TEI PARAHÎ
I TE OIRE RA O LONEDONA, I BERITANI.

Te Parau Tuatapapa no
Iosepha Semita.

(TUATIRAA.)

PENE XIII.

MATAHITI 1830-1831.

Te haereraa o te Ekalesia i te pae o te tooâ o te râ. Ua haere Iosepha ma i te fenua ra o Missouri. Te fenua Ziona i haamaitaîhia e Sidine Ritidoni ei haaputuputuraa no te Feia Mo'a. Te fenua tiaraa o te hiero na Iosepha (metua) i haamaitai i te oire ra o Inidipenideni, i Missouri.

I MURI iho i te a'o haereraa o te mau taeae i te evanelia i te ati Inidia i te pae o te tooâ o te râ, te rave noa ra Iosepha i te ohipa i te oire ra o Faete. E i reira e rave rahi te taata ua tae mai ia'na ra, o tei hinaaro ia ite ratou i ta te Atua i hinaaro ia ratou. E e rave rahi te heheuraa i horoahia ia Iosepha ei faaiteraa'tu ia ratou i ta te Atua i hinaaro.

I te avae ra o Ditema ua tae mai Sidine Ritidoni raua o Eduata Paterita i te oire Faete, mai ô mai raua i te oire ra o Ketelani, i Ohaio, e ua hinaaro raua ia rave i te ohipa a te Atua. Ua faaroo ê na Eduata Paterita i te evanelia, aita râ i bapetizohia. E i reira ua bapetizo e ua faatoroa Iosepha ia'na ei Peresibutero. E ua tae mai te parau a te Atua ia Iosepha, ua tia ia rave eie pue taata i te ohipa o te evanelia. Ua faauehia Iosepha ia faaitoito i te haapii, e te a'o hoi i te evanelia i te Ekalesia e te taata atoa. Ua faauehia to te Feia Mo'a i te tufaa fenua rahi ra o Niu Ioka ia haere ratou i te pae i te tooâ o te râ i te fenua ra o Ohaio parahi ai. I te 2 no Tenuare, 1831, ua haapaohia i te oire Faete, i Niu Ioka, te amuiraa toru no te Ekalesia. E e amuiraa oaoa

e te popou rahi hoi te reira. Ua ninihia maira te Varua a te Atua i nia iho ia ratou. E ua faaite atoa mai te Atua ia ratou na roto i te parau heheuraa i horoa'i oia ia ratou i te fenua i parauhia ei parahiraa no ratou.

I te hopea no Tenuare ua faarue Iosepha, e ta'na vahine o Ema, ratou o Eduata Paterita, e Sidine Ritidoni i te oire Faete, e ua haere tia'tura ratou i te oire ra o Ketelani, i Ohaio. Muri iti iho i to ratou taeraa'tu, na roto i te tahi heheuraa i horoahia ia Iosepha, ua parauhia Eduata Paterita, e ua faatoroahia oia e Iosepha i te 4 no Febuare, 1831, te episekopo matamua i roto i te Ekalesia. B. F. S. 41: 3. Ua parahi Iosepha ma i te utuafare o Nuela K. Uitimate e e ohipa rahi tei ravehia e a'na i te haapii e te faaitoitotu i te ekalesia, e e rave rahi te heheuraa i horoahia ia'na i reira. Teie ta Pare P. Paraita Aposetolo i faaite mai i te huru o ta Iosepha fariiraa i te tahi heheuraa. Na te Varua i faaite mai ia'na, e na'na i faaite'tu tei faaitehia mai i tei papai i te parau, ei reira oia e faaea'i i te parau e tae noa'tu ia oti te reira i te papaihia, ia tia râ, e faaite faahou â oia i te parau apî, ia ore e tia râ, e ore oia e faaite faahou, e faa-titiaifaro râ, e ia oti, ei reira e faaite-faahou-hia e a'na te parau, e ia tia râ te papairaa e mea tere te ohipa, ia ore e tia râ te papairaa ua taupupu noa te ohipa, e ia oti te mau parau i te papaihia, ua vaiiho-noa-hia ia te huru â ia te huru.

Ua haapaohia te tahi amuiraa ekalesia i te oire ra o Ketelani i te 6 no Tiunu, 1831, e rave rahi te Feia Mo'a e te mau Peresibutero ua tae i reira. Tei roto i te amuiraa te Varua Maitai, e ua tauturuhia Iosepha e vetahi mau Peresibutero e a'na. Ua itea-atoa-hia te varua ino i reira, e ia itea râ, ua faaue ratou ia'na i roto i te i'oa o te Fatu ra ia Iesu ia reva, haere ê atura oia. Ua faatoroahia vetahi mau taeae parau-tia i te Autahu'araa Rahi i taua amuiraa ra. I muri iho i te amuiraa, ua faauehia te peropheta o Iosepha ia faataa, e ia faatoroa ia vetahi mau Peresibutero i te ohipa

evanelia. E ua na reira oia e tatoopiti atura i te tonoraa ia ratou i te pae i te tooâ o te râ, e ia a'o haere i te evanelia e tae noa'tu ratou i te fenua Missouri. Ua parauhia ia haapao ratou i te amuiraa ekalesia i muri i te fenua o tei faataahia e te Atua o Ziona, oia hoi o Missouri.

I te 19 no Tiunu, 1831, ua faarue Iosepha, Sidine Ritidoni, Maratini Hareti, Eduata Paterita, Iosepha Coe, Viliamu W. Phelepe, A. S. Gilibeta e ta'na vahine i te oire Ketelani. Ua haere ratou na nia i te pereoo e tae a'era i te oire ra o Cinicinata, mai reira'tu ua haere ratou na nia i te tahi pahi auahi, i nia iho i te anapape ra o Ohaio, tere atura i te oire o Louisville, mai reira fano faahou'tura te pahi e tae'tura i te oire ra o St. Louis. E i reira ua taa ê atura ratou. Ua haere Iosepha, Eduata Paterita, Maratini Hareti, Viliamu W. Phelepe e Iosepha Coe na raro noa e tae atu ai ratou i te oire o Inidipenideni. E i reira ua farerei Iosepha ma ia Olive Taudere e te mau Peresibutero e rave rahi. Ua taa ê na ratou i na avae e iva i muri a'e, e i taua farereiraa ua ite ratou te rave itoitonoa ra ratou atoa i te ohipa a te Atua, ma te anaanatae o te aau, oto ihora ratou i te oaoa. A tia noa'i ratou i nia iho i te fenua Ziona, ua tupu te mana'o i roto ia ratou e, e fenua maitai e te vahi mau teie e patuhia'i te oire mo'a ra ia Ierusalema Apî, te oire hanahana rahi e tia'i. E fenua repo maitai e te papu hoi, ua tupu noa te mau huru tiare e rave rahi i reira. Tei te hiti o te mau pape tahe te mau raau ua rau i te huru i te tupuraa. E fenua nehenehe i te hi'oraa, e vahi au roa ei parahiraa no te Feia Mo'a. I te 2 no Atete, i te matahiti 1831, ua haamaitai Sidine Ritidoni i te fenua Ziona ei haaputuputuraa no te Feia Mo'a. Ei taua mahana iho â ua amo mai e ua haamau na taeae e hoê ahuru ma piti i te tahi raau i to'na vairaa mau, ei haamataraa i te hamani i te fare matamua i reira. Ua rave ratou i te reira ei mana'oraa i na opu tino ahuru ma piti a Iseraela. Ei te vahi teie i parauhia ra o

Ka Tonisipa (Kaw Township), i Missouri, 12 maile i te pae i te tooâ o te râ, mai te oire ra o Inidipenideni'tu. E ao a'era i te 3 no Atete ua putuputu Iosepha, Sidine Ritidoni, Eduata Paterita, Viliamu W. Phelepe, Olive Taudere, Maratini Hareti, e o Iosepha Coe i te oire ra o Inidipenideni, ei reira ua haamaitai Iosepha i te vahi no te tiaraa o te hiero, mai tei faaitehia e te Atua. B. F. S. 57: 1.

I te 4 no Atete, 1831, ua haapaohia te amuiraa 5 no te Ekalesia i te fenua Ziona, mai tei parauhia e te Atua ra. Te pae rahi o taua amuiraa ra o te Feia Mo'a ia no te fenua Niu Ioka, o tei arataihia e Nuela Naita. I te 9 no Atete ua faarue Iosepha e na Peresibutero 10 i te Feia Mo'a. E mau vaa to ratou, e ua tere noa na nia i te anapape Missouri. I te toru o te mahana, a tere noa'i ratou, ua ite Viliamu W. Phelepe ia Satani, e e mea ri'ari'a rahi i te hi'oraa, a fano noa'i oia (Satani) i nia i te pape. E i reira ua faaitehia ia Iosepha, eiaha ratou e tere na nia i te pape, na te fenua râ. Faarue'tura i te mau vaa, e na te fenua ratou i te haere. Ua tae atu ai Iosepha ratou o Olive Taudere, e o Sidine Ritidoni i te oire Ketelani i te 27 no Atete, e piti avae e tia-hapa i te moeraa, e e piti tausani maile te maoro i te vahi i haerehia. E e vahi rahi ta ratou i haere na raro noa.

—VILIAMU SETEMILA.

(E tuatihia mai teie parau.)

“Area te peropheta e parau teoteo noa i te parau ma to'u ra i'oa, e ere i ta'u i faaue ia'na e e parau, e o te parau atoa ma te i'oa o te mau Atua êê ra, e pohe ia peropheta.

“E ia parau noa oe i roto i to oe iho aau e, Eiaha matou e ite ai e, e ere ia parau i te mea parauhia mai e Iehova ra?

“Ia parau mai te peropheta ma te i'oa o Iehova ra, e aita o muri a'e, aore i tupu taua parau ra, o te reira taua mea aore i parauhia mai e Iehova ra, na taua peropheta ia i parau teoteo noa ra te reira: eiaha oe e mätä'u ia'na.” Deuteronomi 18: 20-22.

Te Mau Parau Api.

I TE avae i mairi a'enei ua û na pereoo auahi i te fenua Amerika, e ua pohe roa e hoê ahuru ma pae taata, e e rave rahi tei haaparuparuhia, e te pae rahi no ratou ua pêpê ino roa, aita râ i mana'ohia e, e pohe roa ratou, e rave rahi tei afaihia'tu i te fare ma'i.

Ua pohe roa na taata toopiti, e ua pau te tahi mau fare parahiraa, e ua hamani-ino-hia te mau fare toa e rave rahi e te tahi mata'i u'ana, o tei tupu i te oire ra o Abilene, i Amerika, i te avae Atete i mairi a'enei. E e rave rahi te mau taata tei haaparuparuhia a mairihia'i ratou i te mau raau i haapuehu-noa-hia e taua mata'i ra.

Te hamani nei te tahi mau taote niho i te niho haavare no te puaa-horofenua. E puaa-horofenua ta te hoê taata, o Sila Simepona to'na i'oa, i Ohaio, i Amerika, e ua ino roa to'na niho, ei reira ua iriti te taote ia ratou e hope roa'e, e ua hamani te niho apî na'na, e ua au roa hoi, e mea maitai roa, aita râ e maoro i muri a'e ua poria faahou oia, no te mea, ua tia ia'na ia amu maitai i te maa no to'na niho apî. Auê, te paari e! E tau maramarama rahi hoi teie.

I te mahana 23 no Setepa, 1911, i tapae mai ai te pahi ra o Mariposa i Tahiti nei. E ua tae mai nei te mono o to tatou taeae, Viliamu Setemila, o Farani Fulumare to'na i'oa, e ta'na vahine o Mate (Maud). E 27 no te avae i mairi a'enei i reva'tu ai teie nei pahi, e ua reva'toa'tu to tatou taeae o Viliamu Setemila e ta'na vahine o Maria e na tamarii toomaha. Ua oti maitai roa ta'na ohipa i te mau fenua moana nei i te haapiiraa i te evanelia i te taata ma te mārû, e te haehaa, e te aroha rahi i te taata. Ua tupu te oto o te ekalesia i te mahana a reva'tu ai ratou.

I te 16 no Atete i Amerika, ua haamahitihia te tahi taata, o Anederea Tote to'na i'oa, no roto mai i te fare tapearaa. I na matahiti 20 e tiahapa i mairi a'enei, ua parihia oia i te hara rahi taparahi taata, ua haavâhia e ua faautuahia ia i te utua ia vai noa oia i roto i te fare tapearaa e tae noa'tu i to'na poheraa. Te rave ra oia e te hoê taata o Setephano Tote te i'oa i te ohipa i roto i te hoê fare hamaniraa auri. E na Setephano taua taata ra i taparahi. E i muri iho horo'tura oia i te fenua Europa parahi ai. Na mua iti ai i to'na poheraa ra, ua fa'i atura oia i te mau taata i pihaiho ia'na i teie nei parau, oia hoi, aore roa Anederea i taparahi i taua taata ra. Na'u iho i taparahi ia'na. E ia ite te mau taata toroa i te reira, ua tuuhia Anederea e ratou ia haere noa oia ei taata tiamâ e te hara ore. Area râ e mea aroha rahi i te mea e, ua hoo na oia i te hara o te hoê taata ê, e ua paruparu oia no to'na parahiraa roa i roto i te fare tapearaa ra.

Te parahi nei te tahi vahine ruau i te tufaa fenua Georgia, i Amerika, e ua taea i te 111 o to'na ra matahiti. Tei pihaiho ia'na te tahi tamahine na'na, e 90 to'na matahiti. Ua fanau taua vahine ruau ra, o Maria Proctor to'na i'oa, i te 30 no Eperera, i te matahiti 1800, e ua faaipoipohia oia i roto i te 10 o to'na ra matahiti. Te ora ra oia i raro a'e i te faatereraa hau o na peresideni no te Repupirita Amerika e piti ahuru e ma pae, mai te Peresideni o Ioane Adama e tae roa a'enei ia Viliamu Tafa, peresideni i teie nei â.

Te parahi ra te hoê taata, o Viliamu Senesera to'na i'oa, i te fenua Amerika, e i te hoê mahana i te avae Atete i mairia'enei, ua haere oia i roto i ta'na fare parahiraa puaahorofenua, ei reira ite atura oia i te tahi ophi taero rahi, i parauhia ophi maniania i te nohoraa. Ua ite taua taata ra te vai nei te tahi atu â huru ophi, i parauhia ophi ereere, ei enemi rahi no taua ophi maniania ra. E i reira ua marei haere i te tahi ophi ereere e ua noaa ia'na taora'tu ai oia i te reira i pihaiho i tei vai i roto i te fare. Ua tito puai raua, e ia maoro a'era i te tito-noa-raa, ua haru te ophi ereere i te arapoa a to'na enemi, e ua mau maite ihora, tapeahia'tura i to'na mata'i, pohe roa ihora oia. Ua riro taua titoraa ophi nei e mea maere rahi, e te arearea hoi i te mau taata, o tei mataitai atu te reira.

Ua noaahia ia Marere a Patea te hoê poe, e ua hoohia i te moni 260 dara. Ua hoohia te poe a Maruake a Taroa i te moni 200 dara. Ua hoo atu o Nisodemo i ta'na poe, 1000 dara. E ta Pou a Moo, ua hoohia ia i te moni 20 dara. Ua hoo-atoa-hia ta Kaua a Pou poe, 180 dara. Ua hoohia ta Teuira a Raka poe, 1,200 dara. Ua hoohia te poe a te taata ra o Temo-roa i te moni 2,800 dara. Ua noaa faahou â te hoê poe ia Kaua a Pou, e ua hoohia i te moni 275 dara. I te 3 no Atete i Takume, ua hopu te hoê tamaiti, o Tagaroa to'na i'oa, e tamaiti na Manahune, Tavana no Hikueru. Te hohonu o te vahi ta'na i hopu i raro e hitu etaeta ia, e ia tae oia i raro ua pohe roa. E ao a'era ua hunahia oia. Ua pohe atoa te tamaiti ra, o Moterauri i te 3 no Atete. Ua vai noa oia i te ma'i i na mahana e rave rahi. E tamaiti na Teroromaihiva no Takume. I te 17 no Atete ua pohe roa te tamahine ra o Tepou na Tufaufia no Hikueru. E huru maoro to'na vai noa ra i te ma'i. Ua pohe roa te tahi âiu, o Tekara to'na i'oa, e tamahine na Tara a Huri e na te vahine ra na Kataka a Tuanaga.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.